


四明叢書

張宗祥



明明子論語集解義疏卷十五

清定海胡寅伯寅撰

衛靈公第十五

釋文凡四十九章翟氏攷異云以孟子趙注言論語四百八十六章統全

經計之釋文九字當是三字之誤蓋注疏分明日遂行以下爲一章鄭本有子曰父在觀其志二句在知及章後故爲四十三章朱注刪并爲四十一章其實問陳在衛絕糧在陳二事相距甚遠在陳以下宜別爲一章也

衛靈公問陳於孔子

注孔曰軍陳行列之法也

孔子對曰俎豆之事

則嘗聞之矣

注孔曰俎豆禮器也

軍旅之事未之學也

注鄭曰萬二千五百

人爲軍五百人爲旅也軍旅末事本未立則不可教以末事也

明日遂行

釋文陳作陣直刃反本今作陳俎側呂反史記世家引作問兵陳筆解對曰上無孔子二字明日遂行四字注疏本皆連下章惟朱注截此句爲一章是也

正義曰史記世家孔子臨河而反乎衛入主蘧伯玉家他日靈公問兵陳孔子曰俎豆之事則嘗聞之軍旅之事未之學也明日與孔子語見蜚雁仰視之色不在孔子孔子遂行復如陳夏衛靈公卒索隱云此魯哀公二年也左傳哀公十一年孔文子之將攻太叔也訪於仲尼仲尼曰胡簋之事則嘗學之矣甲兵之事未之聞也退命駕而行夫子前後答衛之君臣

語意皆同豈真有文事而無武備哉然子言爲政先
足兵嘗曰好謀而成我戰則克史記世家季康子謂
冉有曰子之於軍旅學之乎性之乎對曰學之仲尼
故夾谷之會以兵加萊人而齊侯懼三都之墮命申
句須樂頎伐之而費人北至於及門諸子子路以禦
侮之材固善於治軍旅冉有以用子退師樊遲以三
刻踰溝曾致勝於清之一役而公良孺賢而有勇嘗
以家車五乘從游子藉其力以過蒲蓋三代士合兵
農六藝敎通射御聖門未嘗不嫻軍旅也惟是爲國

以禮佳兵不祥聖人不得已而用之大戴禮三朝記
用兵篇夫子對哀公曰聖人之用兵也以禁殘止暴
於天下也及後世貪者之用兵也以刈百姓危國家
也蜂蠆挾螫而生見害而校以衛厥身者也人生有
喜怒故兵之作與民皆生聖人利用而弭之亂人興
之喪厥身是以聖人未嘗不言兵而亦未敢輕言
兵故子之所慎其一在戰也衛靈以鄆澤之盟受援
手之辱結連齊魯與晉爲難子以務外不如治內事
大所以保邦晉霸雖衰衛非所敵故不答而去之卒

之靈公卽世內難頻仍雖有王孫賈之善治軍旅無所用之而夫子策衛政必以正名爲先務保衛庶仍以富教爲要圖俎豆之對其旨遠矣黃先生云禮曰禮之所尊尊其義也其數可陳也其義難知也知其義而敬守之天子之所以治天下也曾子言邊豆則有司存者事之數也夫子以俎豆對衛靈公者欲因事以知其義也

孔注云云疏曰以軍陳爲行列者陳借字正字作陳說文陳列也顏氏家訓書證篇謂王義小學章

隋書經籍

志小學篇一卷晉
下邳內史王義撰獨阜旁作車是釋文本陣字乃晉
以後俗體也太公六韜有天陳地陳人陳雲鳥之陳
周禮車僕注孫子八陳有革車之陳夏官大司馬中
春教振旅司馬以旗致民平列陳如戰之陳中夏教
芟舍中秋教治兵中冬教大閱皆如振旅之陳左傳
鄭爲魚麗鵠鵠之陳魯爲支離之陳楚武王荆尸而
舉晉魏舒毀車而徒笠澤之戰越爲左右句卒黃池
之會吳爲徹行方陳此軍陳之見於經傳者陳法莫
詳於通典首載黃帝制陣法風后握奇經天地風雲

龍虎鳥蛇四爲正四爲奇餘奇爲握機天地之前衝
爲虎翼風爲蛇蟠圍繞之義也虎居於中張翼以進
蛇居兩端向敵而蟠以應之天地之後衝爲飛龍雲
爲鳥翔突擊之義也龍居於中張翼以進鳥掖兩端
向敵而翔以應之唐獨孤及八陣圖記云黃帝順殺
氣以作兵法文昌以命將風后握奇制勝作爲陣圖
蓋太公之四衝陣孫武子之常山蛇陣諸葛武侯之
八陣李衛公之六花陣皆不出風后之遺意黃氏謂
黃帝有五陣直陣屬木銳陣屬火圓陣屬土方陣屬

金曲陣屬水要之五陣亦卽八陣也云俎豆禮器者
凡祭器鼎俎奇而籩豆偶明堂位俎有虞氏以梡斷
木爲四足而已夏后氏以嶽中足爲橫距之象殷以
楫如枳楫之曲撓周以房俎足下有跗如堂房其長
皆二尺二寸廣一尺二寸高一尺豆見曾子答孟敬
子章

鄭注云云疏曰周禮夏官敘官凡制軍萬有二千五
百人爲軍軍將皆命卿二千有五百人爲師師帥皆
中大夫五百人爲旅旅帥皆下大夫百人爲卒卒長

皆上士二十五人爲兩兩司馬皆中士五人爲伍伍皆有長又小司徒云五人爲伍五伍爲兩四兩爲卒五卒爲旅五旅爲師五師爲軍此皆鄭注所本也

在陳絕糧從者病莫能興

注孔曰從者弟子興起也孔子去衛如曹曹不容又之宋

遭匡人之難又之陳會吳伐陳陳亂故乏食也

釋文糧音糧鄭本作糲音張云糧也皇本作糲

正義曰史記世家定公十四年孔子年五十六由大司寇行攝相事齊人歸女樂孔子遂行適衛主於顏濁鄒家衛靈公奉粟六萬居十月去衛將適陳過匡

匡人止之及圍解去卽過蒲月餘反乎衛主遽伯玉
家有見南子事居衛月餘靈公與夫人同車使孔子
爲次乘於是去衛過曹是歲魯定公卒孔子去曹適
宋有桓魋之難適鄭與弟子相失遂至陳主於司城
貞子家歲餘吳王夫差伐陳取三邑趙鞅伐朝歌楚
圍蔡蔡遷於吳吳敗越會稽有隼集於陳廷而死楷
矢貫之石磬陳湣公使問仲尼孔子居陳三歲會晉
楚爭彊更伐陳及吳侵陳陳常被寇孔注以絕糧在此時魯哀公元
年陳湣公八年也孔子有歸與之歎於是去陳過蒲蒲人止

孔子賴公畏孺以勇力鬪而免遂適衛靈公聞其來
喜而郊迎然老怠於政不用孔子於是有期月三年
之歎趙簡子攻范中行伐中牟佛肸畔使人召孔子
子路不說有塹白匏瓜之喻時又擊磬而遇荷蕢鼓
琴而學師襄孔子既不得用於衛將西見趙簡子聞
竇鳴犢舜華之死也臨河而反乎衛入主遽伯玉家
他日靈公問兵陳仰視蜚雁孔子遂行復如陳夏衛
靈公卒索隱云此魯哀公二年也立孫輒六月趙鞅納蒯聵於戚
冬蔡遷于周來是歲魯哀公三年而孔子年六十矣

夏孔子在陳聞桓釐廟災秋季桓子卒遺命康子召

孔子乃使召冉求孔子又有歸乎之歎明年孔子自

陳遷於蔡蔡昭公將如吳大夫射殺昭公

徐廣曰哀公四年也

楚侵蔡秋齊景公卒

徐廣曰哀公五年也

明年孔子自蔡如葉

有對葉公問政及語子路憤樂忘憂之說去葉反於

蔡連遇長沮桀溺荷蓑丈人遷蔡三歲吳伐陳楚救

陳

徐廣曰哀公六年也

軍於城父聞孔子在陳蔡之間楚使人

聘孔子將往拜禮陳蔡大夫合謀相與發徒役圍孔

子於野不得行絕糧從者病莫能興孔子講誦弦歌

不衰有對子路君子固窮子貢一以貫之及顏子道
大莫容之說於是使子貢至楚楚昭王興師迎孔子
然後得免昭王將以書社地七百封孔子以子西之
汭乃止其秋楚昭王卒於城父孔子遇楚狂於是自
楚反乎衛是歲也孔子年六十三而魯哀公六年也
蒙案據史記孔子世家及陳杞世家十二諸侯年表
攷之謂絕糧當在陳潛公十三年魯哀公之六年也
據孔注當在陳潛公八年魯哀公之元年也朱子以
論語連記問陳絕糧事謂絕糧當在去衛復如陳時

則魯哀公之二年也然問陳絕糧本非一時事繫明日遂行於下章乃注疏本之誤汪武曹以陳蔡追隨之弟子考之哀公二年游夏年皆未踰十五恐未能以文學顯名而從師跋涉則絕糧當在哀六年史記得之但謂陳蔡大夫以兵圍孔子是時陳蔡臣服於楚楚聘孔子陳蔡大夫安敢圍之況楚方救陳而乃圍其所聘之人尤無此理以傳考之此時蔡卽吳陳事楚兩國大夫趨向各別蔡又遷於州來與陳遠乃越國相謀其圍一無怨無德之過客尤不可解也然

則孔注謂因陳人被兵而絕糧此於情事爲近但繫
之去宋適陳時則以哀元年吳亦伐陳而誤不若史
記之年爲可據也毛大可賸言曰孔注據莊子謂孔
子之曹不容之宋遭匡人之難於是之陳而吳適伐
陳陳亂故乏食則又誤注者夫子之宋遇桓魋之難
不是匡人且據年表定公十三年夫子適衛十四年
適陳是時並無吳師伐陳又且在陳絕糧與阨於陳
蔡是一時事夫子是時尙未適蔡至哀三年夫子去
衛適陳又久之適蔡至六年而始有吳伐陳楚子救

陳之事見於春秋絕糧之阨當在此時孔氏誤也若在陳歸與之歎亦一時事而史記誤分論語孟子爲二以定公年在陳作孟子歎時哀公年在陳作論語歎時大抵夫子五適衛三適陳一適蔡而後歸魯歸與之歎則在第三次適衛第二次適陳之際絕糧之阨則在第四次適衛第三次適陳之際他無與也故嘗較夫子轍迹與論孟合者自去司寇後卽適衛是時衛將奉粟六萬爲夫子祿而仍不能用孟子所謂主顏讎由所謂於衛靈公際可之仕皆在此時此